

von Wulf Wager

Zeit koscht Geld



Heitz'tag ka jeder schnell zo ma kloina Vrmöga komma – vorausgesetzt, er hot vorher a groß' g'het. I moin jetzt net amol die Bankabzocker. Noi, i moin die kloine Abzocker, de ne mr jeden Dag so begegnet. Hend Sia zom Beispiel amol Ihr Telefonrechnong ibrprüft auf Gebühra, dia bei Warteschleifa entstandat? Also, wemmr eigentlich a schnelle Hilfe bräucht ond statt dessa

leicht amol a komplette Mozartoper zom höra kriagt. Bis zu 18 Minuta hangsch do manchmol en dr Warteschleifa bei ra "Hotline" voma Telefoabieter oder von ra Flugxellschaft. Des hot jetzt a Studie von de Greane ermittelt. 700 Teschtaruf bei Hotlines hend dia gmacht ond domit 's ganze Geld von dr Fraktion aufbraucht. Na ja, ma sott voma Ocha net meh vrlanga, als a Stückle Rendfloisch ...

"Hotline", des hoißt schnelle oder heiße Vrbindung. Hoiß wird dr's do aber erscht, wenn de dei Telefonrechnong a'gucksch. Fir die Beträg könn-tescht glatt au d' Berliner Philharmoniker eifliega ond d' kleine Nachtmusik spiela lassa. Drbei hot "Hotline" nix mit dene Sex-Telefonnummra vom "9 Live" zom doa. Bei ra Hotline sottsch eigentlich a schnelle Hilfe kriegga. Statt dessen hilft dir dui Hotline, dei Bankkonto zom leera.

Mir brauchat koin dritta Weltkrieg. Mir hend Kapitalismus, Kommunismus ond Telefonxellschafta. Mir lassat ons von dene Abzocker oifach z'viel gfalla. Do sott ma mol aufstanda drgega, 's Handy, 's Internet ond 's Telefo abschalta ond kündiga. Aber mir hängtat do scho an dr Nadel. Send süchtig gmacht worda, ohne dass mr's gmerkt hend ...

Bis näggschd Woch'

Ihr

Alle Kolumnen zum Nachlesen
unter www.woascht.de
em Facebook em
Wulf Wager Fanclub

A handwritten signature in black ink, appearing to read 'Wager', with a long, sweeping underline that extends to the right edge of the page.